

四庫全書

集部

欽定四庫全書

集部

角上者舊詩卷十六

詳校官右中允

臣薩敏

主事銜

臣徐以坤覆勘

總校官庶吉士

臣朱鉉

校對官編修

臣盧遂

謄錄監生

臣周克鵬

欽定四庫全書

雨上耆舊詩卷十六

監察御史胡文學編

先肅齋先生

諱鼎字玉鉉，鄴嗣四世祖也。本宋太尉忠襄公顯忠後。宋末徙家于鄞。隱居三世。至先生博學有詩名。亦工書法。閉門寡營。自稱大隱。里中稱為肅齋先生。

雨歎

一春苦積澍萬井坐奔流湖海應同溢甌宴可望收始  
知天大漏不信地全浮終日垂高望能無杞國憂

楊處士起文

字浩卿別字熙正其先世再十一君生德祐之末隱  
居不仕作詠史詩自見浩卿生元末亦不仕以貲甲  
于鄉洪武中治豪右方嚴浩卿自以族之豪也懼及  
乃散其家千金避居葑里因作移居詩至今傳之子  
範即栖芸先生弟起哲字彥卿亦能詩

移居葑里

擾擾征徭八九年千金散盡一身全  
移居近向三家市負郭惟餘半頃田  
滿圃松葵含暮雨繞門桑柘靄春烟  
日高柴戶無人到醉向花陰自在眠

嘉興

花繞樓臺水繞城舟人說是古嘉興  
小筐采藥烟中出短笠分秧雨裏行  
隱隱河魚吹晚浪飛飛烟鳥入春陵  
收帆一醉河橋酒鼓枻清歌對月明

章處士審言

失其字郡志隱逸傳稱此君與陳觀孟顥王毓用賢  
並洪武中高士相與游從賦咏自餘不以世事屑意  
為一時所重

客揚州送所知歸鄞

與君沙上別把酒惜分襟楚國山河舊吳門驛路深斷  
雲開曙色繁木護春陰羣從如相問衰顏動越吟

贊菴先生周禮

字吾學性剛介絕俗嗜學窮研經史每感歎時事輒于詩文發之援筆即成不煩意匠晚年授徒日湖之上惟以講學論文為事他無所聞因號贊菴

五磊

雨歇雲收山氣濃曉來遮偏翠芙蓉小童門外忽驚報失却前村五磊峯

白雲先生金華

字宗實洪武中從戍燕山衛弟忠以卜事干成祖于

燕邸靖難後遂拜兵部尚書先生心薄之成祖嘗欲  
推恩授先生官力辭得賜歸歲居東湖韓嶺宅足不  
入城府日坐一小室中泛覽經史手所點定書餘萬  
卷終老不懈每值風日佳時泛單舟湖上竟日而返  
尚書常迎先生至金臺官舍甫數日先生謂曰汝祿  
雖萬鍾其如我湖山樂何即日買舟還尚書卒復召  
見賜白金文綺先生伏闕謝曰臣野人布衣無所用  
此帝稱為迂叟年八十七日讀宋史至王倫附相

檜事撫掌發嘆遂頤脫而逝嘗自號白雲野叟時因稱白雲先生平生吟咏甚多俱失傳

湖上

湖頭蜂蝶共尋春只有啼鵑最惱人便與黃鸝一樣打無人識得是君臣

李處士衢

字文亨

過阮十二家

吾愛秋山好頻過處士家風驚當戶犬葉趁過溪鴉坐  
右欹叢菊杯前落片霞茅茨堪結伴薇蕨徧生涯

詹處士復禮

逸其字

賦得鬱鬱園中柳送行人

鬱鬱園中柳芳姿靄晴曠春風動微和零落多華滋皎  
皎揚素花濯濯垂繁枝同袍戒嚴裝奄忽與我違焉知  
遠行邁欲好不終期扳條聊以贈悠悠起遐思

李文學鍔

字仲威號松崖有竹窗集

輓長清李處士

薤露悲歌不忍聞難招地下老脩文絃中白雪人何處  
句裏長清稿未焚屐印落花微徑沒尊空明月半窗分  
夕陽流水東山下松柏森森對古墳

王處士節

字孟禮號墨莊深寧先生後人也

武陵桃源圖

仙境悠然隔世塵此中俱是避秦人衣冠不識君臣禮  
風俗惟知父子親兩岸落花飛片片半溪新水漲粼粼  
重來劉驥無消息更有何人解問津

洪處士性

字復之號菊泉

擬古

青青巖畔松莞莞山上柏矯矯舍貞姿交情固金石盈

盈苑中花灼灼誇顏色翩翩遊俠兒看花滿街陌紛紛  
豔綺羅輪蹄密如織高宴動歌鐘歡娛每終夕好花忽  
零落寂莫稀人迹願崇歲寒節矢心終不易

李處士澤

逸其字

千里思

長安一去五千里思心日夜如流水寂寂鱗鴻滄海涯  
依依桑梓斜陽裏隔葉啼鶯不可聽閉門芳草空復情

人生出處古來有南北相思同月明

鄭徵君惟廣

字汝誠號蘭谷其詩與張東臯梁友蘭齊名

谷亭閑登眺

客愁長在兩眉邊惟有看山一莞然却怪故山看不見  
愁眉還上閘河船

周處士普

字德施號守拙司訓周先生序之子也為詩有父風

秋思

露下蘭無香風高葉初墮空庭不見人落月照孤座

王通判潤

誤入

字崇德號友石中成化中鄉薦官通判

小艇

故人尋舊約小艇遠相遇天影波千頃蘋香雨一蓑霞  
明紅葉豔山近白雲多落日滄江曲離愁奈爾何

洞雲張先生時敏

字日新東臯先生子也少承家學通經史百家言弱冠補諸生一試不第輒棄去其詩風格溫厚有韋柳遺意為時所傳身敦至行見人善輒稱之聞有揚人之過者即愀然不樂與人相貿物察其色至厭足乃已雖為所給弗較人稍失利則旬月不能忘嘗曰丈夫不能自建立亦當行善于鄉為世楷模因書其壁曰人生無欲始高天下為善最樂里中頌之課其子邦奇成大儒歷贈翰林學士吏部左侍郎所著有洞

雲稿行世

病中強和東沙春官夏日詩

江鄉暑氣溽心靜自清虛草色門前徑榆陰屋外渠養  
生無異術娛老有閒書羨彼沙頭鳥浮游日自如  
欲覓廣寒路緣無萬仞梯就涼憑竹牖扶病涉花溪庭  
雀依人噪桑鳩逐婦啼不冠兼不襪長畏報輪蹄

曉發紹興城外

起踏船頭覽物華塵蹤一夜伴蘆花雞聲催淡山頭月

鴉陣啼紅海面霞到岸喧聲皆旅舶隔橋烟火是漁家  
片雲忽散蕭蕭雨更掩蓬窗聽煮茶

乙亥九月望日蕭山舟中寄弟

舊遊二十年前路頭白重來仗輶轤兩岸好山蓬外柳  
五更疎雨枕邊蘆夢遙池館詩誰續興拍江郵酒自沽  
惆悵忍看南去雁海雲明日又三吳

夏日久雨

積雨綿綿苦未收頓令平陸是洪流好山何日能當戶

明月多時不上樓年來將登成半損晚秧新插待重抽  
稈材自分甘空食猶抱農夫終歲憂

睡漁圖

扁舟隨處即為家雙鬢無愁也自華抱楫西風眠正穩  
不知新月上蘆花

梁處士衡

字士平號友蘭與東臯相倡和時謂其絕句不媿唐

人

蘆雁圖

平沙淺水帶斜陽  
叫破南雲憶斷行  
莫怪蘆汀栖未穩  
瀟湘雖好是他鄉

題雲山小影

雲谷衡茅自結隣  
山光樹色四時春  
舟行不出前溪口  
知是秦人是晉人

見燕

翠竹幽窗傍水開  
東風吹暖讀書臺  
不知門外春多少

又見雙雙燕子來

先棟塘先生

諱正華字本素鄴嗣七世祖也少傳大父父家學工于詩性不樂仕進慕義專赴人之急諸弟與貢使互市負其錢十餘萬罪死先生為破產償得免族中女將嫁有期而父母死無所辦適先生亦遣女乃迎族女歸為笄治裝同日嫁與鈞且先生隱德多嘗夜聞別室有聲起伺之乃其隣人子方盜裂布蒲伏曰適

舉一子天寒恐兒僵倉卒盜先生布死罪先生慮其  
媿曰夜生子此真急時奚暇問奚不疾舉去鄰人子  
曰襄兒布數尺足念先生長者物故裂取足耳先生  
乃并與之謂曰可去矣此惟吾知之家人已燭火至  
先生曰無有鼠闌耳後隣人子竟折節為善及垂死  
乃與人述其事曰李先生真長者雖先生長者終不  
言然吾豈敢自蔽其醜以蔽先生先生又嘗被酒夜  
行前觸盜誤創其頰先生閭中識為某氏子亦竟不

言人亦不知先生是何等創也先生以故家亦稍稍  
落乃盡以砌街大宅讓諸弟使分治而身自居東皋  
草堂耕牧初先生常客白下造書林縱觀乃悉以橐  
中金買書還日課其諸子且耕且讀數年次子循義  
遂以進士起家為名御史先生乃稍葺所栖草堂導  
泉而舍手植雙棟于門塘上徧種四時嘉果極望先  
生擣冠鳩杖澹蕩其間客至命童子采所植樹果就  
水擊鮮作供笑謂客曰吾塘上仰有取俯有拾先生

風格既高草堂復當山水交會處以故四方名薦紳  
詞客俱題詩咏棟塘先生隱居傳于遠近嘗有太守  
秦君造謁先生款客語止宿已見十餘人從田間輶  
耕歸俱笠而荷鉏犂中有二丈夫須眉甚偉與諸田  
奴別秦君心異之使遣問則先生第三四輩子也秦  
君大驚曰是俱御史介弟奚至使執苦若此先生笑  
謝曰若兄雖貴何與弟且人生豈可使失業因啟篋  
取所自咏詩示客指其中二語曰人薄利名何患者

子分耕讀不妨多秦君絕歎服而去

草堂遣興答見贈諸公

悠然扶杖自行歌春到茅堂風日和人薄利名何患者  
子分耕讀不妨多坐憑片石堪為几臥覆叢花亦當蓑  
却命預陳斗酒待昨來溪友許相遇

貿束之舍足幽栖中有先生日杖藜水到門前三派合  
山來簷下六峯齊比間合放吾儕老何事遙煩公輩題  
自咏數篇渾漫興草堂莫比浣花溪此詩三四一聯文  
衡山太史為大書

鑄于吾家門石至今樵叟牧  
豎過先生故居俱能誦之

魏文學教

逸其字雲松先生子也所著有東溟集

次韻車廡驛中

旱途跋涉始逢涼一濯塵襟秋水光幾樹清陰生驛道  
千山秀色入江鄉居民多就館人役歲月無如官棹忙  
迎送往來多少客不知功業有誰長

林文學禹

字文絅所著歸正集

次趙竹心推篷圖韻

曉汎湘江上推篷望楚天低烟拖密篠小雨濕垂蓮隔  
壞難沽酒蓬堤欲繫船往來情不厭歸興獨茫然

題山水圖

一湖新水浸青山遠遡舟程杳靄間碧檣垂烟秋色澹  
白沙沾雨晚波閒萍開魚似知人樂葉動禽先避客還  
獨有逋翁吟正苦倚蓬高眺指烟鬟

史處士自守

字端仁號雪窩以詩鳴于世

古意

新郎卜遠行風雨阻去騎安得再風雨來朝猶未去  
雲錦靚秋風白露沁芙蓉芙蓉香未減內有心重重

白頭吟

白頭吟與君結髮為同心越羅新裁鸚鵡綠寶釵斜  
鳳凰金蛾眉灣灣豔曉月春風環珮飄飈音合歡攜手

步庭下月明笑語花陰陰此時恩愛期白首豈意君心  
輒相負出門馬足疾如飛揮金長醉青樓酒專房割愛  
妾身孤妾孤進羨鴛鴦偶羅襦未暗玉珥明妾心戀君  
君無情泥沙紛紛團不就蟲絲縷縷織不成郎君此去  
重還家夢中笑看菖蒲花

題畫

門前有溪溪最小坐對小溪興不少溪口天濛雨亦奇  
溪面白日浮晴更好芙蓉開遍柳葉長鷗鷺乳下雙鴛鴦

鷓鴣背拂柳葉影鴛鴦口唼芙蕖香畫槳輕搖放舟去  
鯉魚吹浪浪花細石灣遞出櫂歌聲老樹斜臨波淺處  
溪源活活來未已魚箔鷗巢對溪渚須知溪小受天多  
倒浸明河幾千里

贈肅齋李先生

詩 拙  
誤 刻

不出非無故曾將世態論布衣如可賤風節孰為尊有  
托吟梁父無求隱鹿門白雲飛滿目消息任乾坤

秋日

次寥天氣靜獨坐啟郊扉月淡桂花發風清草葉稀秋  
樊憐鶴瘦晚釣憶魚肥久混紅塵迹登高欲振衣

季春書懷

東郊初日霧四曠絕囂塵老至猶為客花殘已過春青  
衫沾淚濕白髮夾愁新未了平生業乾坤耐此身

彭墓山居

生平性癖樂幽居彭墓山中自結廬春屋頻篤留客酒  
夜窗遠作寄僧書松陰織戶寒猶重嵐氣侵衣午未除

誰笑陸沉歸舊隱王門應懶曳長裾

過石碑村居

晴原蔓草路橫斜寂莫依稀隱士家山檻雨霏歸燕子  
籬門風軟落桐花牀邊珠滴春鴉酒燈下塵飛夜碾茶  
白叟不知京洛事瓦盆竹几樂年華

倪畏菴先生復

字汝新為人風格嚴整力學無間寒暑兼勤劄記性  
不喜搞搞章句尋源探本務得指歸善說易旁及諸

經研精聖賢之學考正古禮尤深于鐘律潛思默解  
能通其妙亦喜錄古今見聞留心經濟授經數十年  
師道甚尊善獎成後學若通政余先生本其高弟也  
平生篤于孝友執親喪遂成目疾弟子所上束脩不  
入私室盡以資諸弟束身有禮市肆優場不一履其  
足里中俱嚴事之每相聚談謔聞倪先生來輒斂聲  
起嘗與郡中士大夫名士雅集先生最為宿老一日  
客畢來待先生久或曰吾輩且虛上席先飲若何及

奏樂有客曰倪先生至門聞樂聲自必返矣偵之果然乃傾一座客造門謝先生徐曰是亦何罪但異時有長者客尚須待之其持正若此所著書甚多大者有易繫詞解中庸解正蒙發微皇極經世通解鐘律通考閒居漫讀記東菴雜著壺齋問答救灾集議禘祫議濬湖議見聞欄楯觀古錄畏齋稿存于家

讀史

木馬不駕乘石田不堪耕剗萬代更梁削菌以居楹匠

石驚且走工倕還撫膺仰首看白日登高望滄瀛水東  
日亦西紛紛各有營陽和變殺氣雪浪奔長鯨赤精既  
迷漢中原復廢興禍亂不可弭感嘆何時平

飄風起末路日色無光輝猛虎厭獸肉駒虞恒苦飢羣  
狐處中堂麒麟受羈縻陳竇竟火滅衣冠落塗泥上天  
杳且冥是非何所咨古來共嘆息千古成蓍龜

感寓

風高殘暑清露白秋夜長蔓草不復滋蟪蛄弔流光繁

思靡中襟戚戚何能忘鸞刀未發硎割剥摧鋒鎚寶鏡  
匣中埋垢汙何由明元運自淪忽白日去茫茫瑤華恐  
不實泯滅沉風霜安得松柏姿歲寒色蒼蒼

時光更代謝蟪蛄笑蜉蝣嘉禾不成實梯稗矜有秋芝  
蘭種不榮荆棘滿崇丘玄陰結嚴冬芳意坐自適鴻鵠  
將安之懸圃阻且修慙我綿薄姿引領增內憂

端居觀物化悠悠念羣生青春始萌達朱火忽已盈牀  
有一素琴玉軫映朱繩彈為陽春曲琳瑯滿宮庭白日

悵興懷悲來復填膺子期今逝矣千載誰復聽

古意

南國有佳人素質凌朝華麗服粲雲錦襍佩紛文羅含  
情理瑤瑟皓齒發清聲音響激流風徘徊慘難和流光  
遞更駛歲月如頽波歌罷感遲暮曲竟長咨嗟願逢同  
心人采菱發陽阿

登孤山

日脚穿雲蘸碧流紅光晴射水西樓沙明白鳥雙雙下

山好蒼烟面面收誰遣殘粧照華髮仍遺匹練照清秋  
六橋風景依然在冷落孤山草樹丘

登雪竇巖

倚天蒼翠出崕崿中有飛泉瀉碧鳴絕壑風高巖虎嘯  
千林月上野猿驚寺當絕頂丹題見徑轉迴溪素練縈  
畔覺塵區異寥廓欲臨寒碧洗煩纓

江行

野水田田綠江村曲曲斜一筇尋不厭坐占白鷗沙

落日

江城落日與林平  
翻入滄波照眼明  
坐對草堂渾不語  
誰將玉管調黃鸝

薛處士魁

逸其字

雪夜舟居

載雪更宜夕光輝  
激水涯看疑汀上月  
飛作柳邊花清入  
騷人骨寒思貧士  
家冷然身可到  
莫道玉京賒

秋日登甘露寺樓

縹渺名山枕碧流更登上山一層樓不知客眼真如豁  
始見人生果是浮地近金陵邀王氣天開鐵甕抱神州  
御風不盡凭欄想香散天花萬樹秋

沈處士汴

字本梁

冬暮寫懷

寒竹寒松相對形更無知已到幽庭看來只有閒塘柳

春未來時眼便青

沈處士嵩

字嵩之號蕪菴

西陵夜

暮色滿前汀江村半掩扁潮頭西去白山色北來青雙宿花間鳥孤飛水上螢愁懷空脈脈閭自誦黃庭

陳處士鵬霄

字伯玉號翼齋

漁笛

洞簫吹曲下南灣  
子夜涼風月滿山  
自是漁家太平調  
莫教聽作玉門闕

樓臺

高樹離離晚葉黃  
采菱有曲度橫塘  
樓臺自恨臨江水  
日日風前易斷腸

陳處士文璧

字國寶號愛松

柳枝詞

綠柳條長拂玉欄華清宮露幾曾乾  
鼙聲只向花邊去  
月白紛紛樹影寒

張太學嘉慶

字開祖號東閒白齋先生子也少有才自負既長入  
太學益肆志于詩大司馬張公目為豪士余嘗讀白  
齊絕句有示慶子一首曰吾兒才高須槩括官樣文  
章不在奇人道苟高能過母丁寧養護鳳凰枝即其

父亦奇之矣

秋夜泛月

清秋駕單舟舉觴吸明月單舟去復還明月圓已缺天  
漢縱橫流爽籟參差發痛飲傾長餅此懷向誰說

送印子仁歸蘇州

君來白酒熟君去紫菱香越鳥杯前落吳鐘夢裏長木  
蘭江月路芒屨海雲鄉楊柳秋條脆相思贈短章

山閣偶成

原上高低樹天邊起伏山鳥來秋影亂人去白雲閒

戲贈太白山人

黃鶴樓頭枕書臥老鶴長鳴驚夢破青天忽墮白雲來  
捲簾一陣楊花過

高志齋先生士

字克學少孤好學事伯兄以禮兄弗愛也後伯兄為  
吏坐贓盡以已產償家遂落嘗終日貰米未得怡然  
也里中高其人延修郡乘謂鄭清之余天錫附權臣

陷濟王竑得罪名教程徐為元大臣失節三人俱不宜立傳其持議若此晚年益嗜學亦精于醫言醫家之有靈樞猶五經之有易遂注其書行世

同俞正之遊豹巖別墅

幸窮林壑勝此日共君遊循徑相攜手看山欲盡頭鳥啼松徑午雞啄麥田秋他日還相憶溪雲度隴浮

陳璋

逸其字

暮春到天童

行到天童廿里沙白雲深鎖梵王家滿山筍老多成竹  
一路花香半是茶琪樹每巢天上鶴法幢曾辟路頭蛇  
數聲清磬相迎處坐對爐薰泛紫霞

甬上耆舊詩卷十六

欽定四庫全書

甬上耆舊詩卷十七

監察御史胡文學編

兵部右侍郎范公欽

字堯卿號東明以進士出知隨州有治行遷工部員外郎時大工頻起武定侯郭勛為督其勢張甚公以事忤之勛譖于上下公獄杖之闕下出知袁州相嵩其郡人也嵩子世蕃欲取宣化公宇公不可世蕃怒

欲斥之嵩曰是抗郭武定者踣之適高其名遂得寢  
稍遷按察副使備兵九江歷廣西福建雲南陝西諸  
藩臬進副都御史巡撫南贛諸郡擒劇賊李文彪平  
其穴疏請築城程鄉之濠居村設一通判以消豫章  
閩粵之奸復攻大盜馮天爵斬之遷兵部右侍郎解  
組歸時郡中東沙張公竹墟屠公亦以事廢與公並  
里居投閒嘯咏主一時文柄人稱為東海三司馬而  
公築居在兩湖深處舍逕窅曲林木翳然不知在城

市中性喜藏書于舍中起天一閣盡購海內異本列  
為四部尤善收說經諸書及先輩詩文集未傳世者  
與吳門王鳳洲家歲以書目取較各鈔所未見相易  
故浙東藏書家以范氏天一閣為第一卒年八十三  
所著天一閣集撫掌集

公天一閣所藏書最有法至今百餘年卷帙完善適  
余選里中耆舊詩公曾孫光燮為余掃閣盡開四部  
書使縱觀因得鄭榮陽黃南山謝廷蘭魏松雲諸先

生集詩錄入選中俱前此選家所未見者其有功吾  
鄉文獻為甚大矣

七夕曲

波瀾瀾天蒼蒼牽牛織女停七襄不道停時樂祇恨別  
時長倏忽日御薄扶桑駕牛服輶心內傷百媚郎千花  
女爭來乞巧巧不與一曲霓裳淚如縷服箱弄杼殊未  
央明年此夜渡河梁

中秋對月

宛宛天上月流影照中堂  
迅飈屏夙翳四野莽蒼蒼瀨氣汎崇蘭玉露凝為霜  
仰視河漢畔星斗互低昂林鳥無定棲羣起競南翔  
顧念平生親音塵何渺茫昔為月下娛今為穴中藏  
穴中無返日涕泗霑衣裳

漢宮盛嘉麗曲房森鈞連燕趙徵佳人粉黛盈三千冶容傾春葩被服霓裳鮮日夕紛奏御承恩誰得前我欲望昭陽昭陽高造天秋風捐團扇流塵掩朱絃羲和促六轡容華難久妍還顧望明月孤魄行中天悽惻佇永

夜若恩儻未旋

賦得長安道送孫槐溪郡伯入覲

長安大道羅雲烟五城九陌森相連  
隱隱玉闕標北斗迢迢銀闕直中天  
飛塵百道空中起香車寶馬紛流水  
引鞚俄過五柞前鳴鞘却向長楊裏  
長楊五柞並崢嶸雲臺遙接建章宮  
寶鼎杳銷輕拂霧珠簾影動暗生風  
金貂玉佩來無數輸心競博千金顧子  
建新成白馬篇相如更進長門賦別有  
飛詔徵才英炳川渤海皆知名

受爵已沾闕內貴佩刀兼許殿中行此意淒涼邈千古  
濠上龍興寢神武纏帛煌煌下百川布衣往往登四輔  
盛事流傳到我皇中興八葉稱重光造語膝前推上相  
程功闕下多名邦使君五馬來非晏一代循良誰不羨  
待詔先趨金馬門承恩獨上麒麟殿是時千官奉翠華  
長安道上春無涯珠鞭幾拂金河柳絳筆重題御苑花  
男兒立身豈草草乘時致主應須早執戟揚雄苦不遷  
上書馮唐嗟已老憐君意氣薄紫微明良遘會古所稀

雙旌縹渺破沈霧目送遙天鴻鵠飛

汎東湖

澄波四望空畫舸泝冷風野寺輕鷗外人家細雨中菰  
蒲臨水映洞壑與天通即擬尋真去花源杳未窮

懷汪長文時居城寺

久訂看雲約西來悵不逢溪猶通一水人似隔千峯露  
浥中林草風飄遠寺鐘何因乘逸興從爾采芙蓉

懷呂中父上黨

長年依帝子何似漢枚乘結客惟三晉遊人半五陵月  
催授簡雪裏罷呼鷹會念林遊者風前思不勝

清明汶上

春風骀蕩春日晴千村萬村花鳥鳴沿溪鬪草比鄉俗  
隔岸賣花何市聲不向天涯愁寂莫祗須馬上度清明  
勞歌日暮流颺發映燭吟詩興轉生

和東沙八至茂嶼莊韻

盛朝未老即抽身猶向青山自結隣醉後江湖雙短棹

嘯中天地一閒人月來鶴破花階夢雨罷龍消水霧塵  
一自劉郎仙隱去碧溪無路覓芳新

明妃曲

詔下龍荒去陰山雪作花君恩深似海臨發賜琵琶  
曠望蜚狐塞黃雲黯不開祗應天上海還似漢宮來

送吳山人遊太末

江門三月試春衣片鷗風輕去若飛來往富春應不少  
幾人還上釣魚磯

少年行

千金調笑不言奢  
貰酒新豐過落花  
十二街頭春似海  
馬蹄今夜落誰家

工部右侍郎全公元立

字汝德號九山以進士充庶吉士歷官修撰出冊封  
魯藩前此冊使俱厚有饋貽公却不受王重公為手  
題九山圖相贈曰此可無玷太史裝也時相嵩方當  
軸傾首相夏公及楊沈諸君相繼赴西市舉朝寃之

莫敢言公憤然曰使吾職臺諫當以言爭職廷尉當以法爭吾職史獨有董氏筆在耳因作告天文極陳諸公寃狀詞義慷慨相嵩聞之怒甚使人伺公隙無有乃出為南學士公抗疏乞歸不許改南太常寺卿時京營衛士多穿郊壇墮垣為徑道公驚曰此何地敢若是耶遂限以崇垣有犯者治諸衛士以道紓不便相聚出橫語撼公公不為動有樂舞生某坐罪事連助貴人貴人為居間欲寢其獄公曰助貴人得自

免俱坐幸矣尚欲撓吾法耶再遷南工部右侍郎會  
歲旱兩都大臣俱自効相嵩從中持之遂聽公乞歸  
公性至孝歸時髮且斑白益嚴事太夫人出必告反  
必面屬母病自秋涉春不緩帶居喪柴立竟以積毀  
卒年六十八生平無他嗜好庳屋數椽與伯仲皓首  
同居性耿直負節槩不撓初在史館嘗典教內侍有  
過輒撻之後公之孫天叙入館復教內侍有老璫來  
語知為公孫搖首曰當日全先生太嚴其見憚若此

靈之祥

帝受命應天機資坤元定二儀懿母后承令基德婉婉  
容祁祁扶天綱植地維翊聖躬式民彝陰陽和庶物熙  
皇業昌萬國愉軌周姒湛玄禧神西遊驂雲螭徽音垂  
百世師臣稽首揚珉詞

擬古

相思欲斷腸香魂渺相隔落月如有情清光下瑤席郎  
唱采蓮歌妾鼓木蘭楫同行不同歸西風亂霜葉

湖邊晚泊

落日荒城外  
棲鳥匝樹陰  
江空浮月早  
山暝薄嵐深遠  
火驚村吠歸舟咽  
櫓音鄉心正愁絕  
飄泊動孤吟

歲暮述懷

為客經殘臘  
歸家夢未成  
西風一夜雨  
白髮滿頭生  
世路空勞役  
鄉園久係情  
江梅多意態  
相向竹籬橫

中秋

桂白河光淨  
琳宮景物新  
尊前同醉客  
笛裏未歸人  
塞

迴流天籟山高控月輪有懷渾不寐玉露欲沾巾

郎中聞鴈

短髮玄書病自裁清霜白鴈幾行迴一年歸夢驚風起  
此夜邊聲帶月來淮海片雲秋共薄江城殘角暮同哀  
瀟湘千里家何處凍雨西窗首重回

送章參軍之任麗江

燕臺十月霜林曉話到滇南入路岐舟帶西風帆勢飽  
衣沾落葉鴈聲遲沙江流水斜侵郭漢服居民半襍夷

若去幕中勤佐理從來搖俗更澆漓

客至

問字相過饌草亭呼兒看筍覓魚腥農家自笑無供給  
止有南山萬仞青

禮部尚書汪公鏗

字振宗號遠峯以進士選為庶吉士遷編脩教內書  
堂內書堂者諸少閣所業也公每為談小雅巷伯以  
下勵其專良之志歷遷諭德主南京鄉試有當軸以

書屬其子公正色曰國家得人重典此事容可干請  
邪卒不許遷祭酒頒五倫條約禁止超薦及清餼廩  
之乾沒者以給諸生尋擢南工部侍郎三遷為禮部  
尚書兼學士遂引年歸里公為人謹重持體前後如  
畫一蓋前輩詞林之度率如此而公持之益茲性不  
善干要路值江陵當軸倨甚公與之無欵曲直柔而  
已所著餘清堂集典則不詭無汎剽之義如其人焉

送郭仲亭還睢

秋風忽蕭瑟露寒木葉蒼客子滯京邑倦游思故鄉攬轡循脩途日夕以傍徨川原信繚繞欲渡河無梁回首望薊丘君恩詎可忘荏苒風塵暮驅馳道路長歸來視閭里田園日就荒耆舊存者誰相與叙溫涼人心不可測世事總茫茫願以盈尊酒時時沃寸腸

題畫

叢桂植深林芳蘭彌空谷時有幽栖人獨坐山之曲龐公隱鹿門子雲在西蜀巒光如結黛水流如噴玉野田

半荒蕪草木多芬郁對境却忘言洗心遠塵俗願解朝  
市喧從吾意所欲

送詹生還歙

主人寄跡雲門山藤蘿石磴任躋攀閑戶著書人不識  
狂歌對酒心常閒邇來為客長安道落葉空庭秋不掃  
一夕思歸尋舊盟故園景物依然好殷勤為我理芸編  
他日看君步芳草

送閻靜山之贊皇

匹馬西征路秋風木葉催鴈從雲外落人自日邊回覽  
勝時行縣乘閒數舉杯不嫌疆邑少珍重濟川才

送黃子野之南都

金陵自昔稱佳麗水綠蘋香別有情雲起江城堪眺望  
官閑詩社易知名

題江南圖

渺渺鄉關隔何處柳堤風起花如絮孤帆搖曳人未歸  
獨立斜陽無一語

布政使張公淵

字維本號纓泉少孤依其族人在陳州者遂以河南鄉舉中進士授興化府推官甫到官目攝道旁有作睨眎狀者即收訊之果逸囚坐如律一郡大驚攝仙游令值瀕海塘壞漂廬舍而歲方大祲主者難之公請用范資政策發粟廩飢民計日使授役塘成民賴以活百萬計以與時忤平遷工部主事出知武昌府時徵殿木于楚故事官募居賈及旅商資厚者充役

人皆皇駭公定議遣官市木第召商集事者為計值  
上下始帖然然運木久不下當事懼後期得罪計不  
知所出公知楚藩所積大木無算乃多出金購之王  
利貲重且畏公不敢匿木遂數足較采運費三而贏  
一當事俱嘆服以異等遷按察副使備兵紫荆關會  
有妖賊染大林者乘旱蝗嘯聚與大盜安盈輩相掎  
角依山為寨搜牢無虛日公至設方略分其軍為三  
鑛卒善緣險使先路麻陽兵甚銳為中堅官兵持重

居後且命俱勒兵以待公善風角夜起仰視天密令  
諸將乘月明並發破其寨盡斬賊首諸竄匿者俱使  
詣首自贖發廩粟給餘黨盡平當事議上其功公謝  
曰此俱飢民為亂者郡縣不能撫定又不早第除使  
至此若今以為功恐渤海朝歌笑人議遂止歷遷貴  
州布政使以積忤時遂投劾歸里公持守廉介罷官  
橐中無長物里居復十餘年多盛德事余君房先生  
贈詩有曰平生作事都無過今日論貧總不如人以

為實錄焉公少精象數老而不釋所著有革象新書  
萬物數注較六壬天文圖說諸書行世

公所著一舫齋集為吾家子年先生所定故其詩絕  
工王季孺太史叙其後曰先生烟水情深風塵氣少  
郊居以萬竹成塢家園以一舫名齊枕白石而漱清  
泉植青桐而欄紫蘂桂楫泛月湖之上籃輿躋雪竇  
之巔公家居風流略見之矣

花朝

遠道春相待天疑為客晴看花難記色聽鳥不知名羸  
馬何年息肥牛幾處耕農家那解意翻為有逢迎

大柳樹驛

旅抱愁相伴村醪不擇嘉長途還策騎古堞欲投鴉蕉  
灑三更雨燈拋半壁花如何有歸路依舊在天涯

宿華容寺

春深纔出郭山寺暫停鷄月伴僧歸舍雲迎鶴下田鳥  
聲閒入耳塔影巧當筵淨室渾無事清心一篆烟

病起郊行

船放郭門西花深鳥亂啼病餘方厭酒愁絕強分題老鵠徒雙鬢童牛僅一犧小橋歸路晚芳草正萋萋

夏日山房即事

林園敦宿好息偃水雲居捲幔常通燕垂綸豈在魚一  
林刪就竹幾卷讀殘書投老因多病殷勤灌藥龕

靈巖寺

多少登山夢乘春始扣關引泉雙鶴舞覓果一猿還著

寺山偏好逢僧致自閒歸輿仍緩步巖外即塵寰

途中口占

此行不必問淒其麗景偏宜得句奇久不知春憑草木  
原非識路向旌旗野溪渺渺寒風度遠樹微微夕照移  
暫借郵亭今夜宿栩然高枕且無疑

德化坐雨

獨臥江城歸夢頻征鞍暫且息芳塵猿啼烟樹三更雨  
花落風林一片春題不盡詩因景麗耕無遺地為民貧

溪山到處牽余思不但年來苦憶蓴

漁舟

菰蒲深處見漁家燈火昏昏傍小沙夜半雨晴洲上白  
不知是月是蘆花

秋日山房

紅帘斜倚竹枝枯知是前村賣酒爐獨有隣翁相問訊  
今秋種得菊花無

光祿寺卿管公大勲

字世臣號慕雲以進士授庶吉士遷給事中在省忼慨敢直言適宦官滕祥輩奏請復故太監黃錦姪浦都督銜授其族人保等錦衣官使守錦墓家人黃斌等與充御馬監勇士以示存恤上許之公同御史陳聯芳等文章言浦前以不職罷不當復叙而保等欲藉口守墓冒官職斌等以廝卒希充勇士名縻廩祿皆不宜聽事遂寢有師宗紀者以黃冠廁名太常寺卿盜庫金錢千計多犯法公復與鄒應龍交發其奸

得論如律直聲震朝野竟積以亢直忤時出知臨江  
府擢為四川提學副使復降知延平府再以副使督  
湖廣學政遷福建布政使加光祿寺卿致仕公少篤  
于問學嘗取蒙引存疑淺說折衷之著四書三說學  
者宗之為詩長于五言力追顏謝閩中曹能始先生  
為刻其集

雙燕曲

雙燕復雙燕雌雄夾自飛呢呢入簾幙翩翩繞庭闈宴

息文杏梁往來白板扉乘風理毛羽當春趁芳菲雛生  
八九子顧息同珠璣花間時啄食堂上還哺飢啾啾自  
黃口習習成烏衣秋風一夜發辭巢向東歸主德稱無  
量大厦藉光輝願主壽千秋千秋來相依

登江安北巖

僻志懷山水行行搜芳勝悠哉江安道灘逕兩江併北  
巖崿嶮嶒古寺迴孤另主人雅好客殷勤足芳興遵途  
發山麓懸厓陟危磴壁峭排蒼空樹交容一逕弘濟駕

長橋禪林響清磬拂石烟霞凝虛空猿豹聽坐看峯巒  
盤俯視林泉瑩迴岡白玉池瓊液下叢徑仙源寶玄湫  
清流自清澈匪徒愜幽賞惟以滌吾性曠懷既以怡長  
嘯天地定高步有同心茲山亦善應

望九華山

振翮西天來迢迢一萬里乘風下青陽山形削成指翠  
華結層霄芙蓉列九子江南萃佳氣靈異自茲始玉壺  
隱仙踪金丹含玄理乾坤為我爐日月翼兩耳真詮苟

不迷逍遙逸凡軌願言憩蓬壺吾道亦時止

渡沙溪

碧水自南來恰與西溪會陵谷無古今川流自襟帶山形盤地維灘聲響天籟石溜沙不飛樹杪雲如蓋酒旗挂竹陰逸興在天外前村好風日徘徊發清慨

黃氏園亭

看山興不極道逢緇衣叟指點出空門名園在其右荆扉雙塔縣竹徑不設帚林薄鬱以榮盤迴廣十畝方塘

蔽赤鱗悠然自忘笱華閣凌紫霄雲霞結戶牖路轉千  
松闢水從九曲走憩息臨高臺徘徊崇陰久落葉方盈  
庭寒英大如荔茲境信佳麗寰中更何有故園日夜荒  
荆檜曾未剖清賞轉淒其初服慙自負

經行湘南遇雨

驅車度南岡五峯宛相對上千蔽青冥下連亘空翠藤  
蘿蔓不分檜柏紛如隊前旌嵐霧迷四山風雨晦傾崖  
勢嶌嶌飛瀑聲潰潰褰帷喜沾濡覽景疑障礙晴陰態

殊別心賞無憎愛生平汗漫遊適趣良有在

阿育王山

錫山標靈傑迢遞東南來鄧峯聳岸崕太白障崔嵬金  
湖匯澄鑑玉几鋪平臺雲氣嶺頭分陽光谷口開中嵒  
隱古刹高亭盼蓬萊梵音啟天籟塔影凌上台舍利藏  
精光佛跡印蒼苔神龍蟄沙井變化騰九垓烟嵐晴亦  
雨松風晝起雷山花空色相林鳥自喧廻蓮堂白日靜  
竹徑玄鹿猜以茲愜勝賞車蓋常徘徊名巖無今昔塵

劫有時災洞房幾荒廢孤雲自去回此中堪招隱前山

有大梅

王臺驛

候館山雞唱雲門峭壁堆萬家依谷靜獨鳥下溪迴仄  
路披荆棘殘碑沒草萊空傳有王氣無處覓荒臺

安慶渡李陽

客路荆舒盡江帆海國賒天風蔽晴日烟雨漲平沙水  
闊疑無岸春深不見花暮潮泊南浦指點驛樓斜

赤壁

巉巖赤壁倚天橫不盡蕭蕭落木聲莫向周郎論破竹  
却憐諸葛說分荆百年霸業隨流逝千古詞人弔月明  
感慨興亡倍寥落北雲南樹不勝情

風俗

海國春城十萬家交童越女媚年華歌樓估客三更月  
燈市遊人五夜花

布政使沈公九疇

字箕仲號東霍中進士授刑部主事稍遷至郎中出  
以按察副使督江西學校下車先為約學使者按部  
即臺使者移不得入故終其任無得干得人為最盛  
先是公迎父就養邸中既遷四川參政乃奉父還里  
門上書曰臣有父春秋九十有二無入蜀理臣心不  
忍絕裾願終養帝惻然命以左參政仍領江西於是  
再奉父往及執父喪服除改山東值歲積飢平度州  
民聚為盜甚橫公聞慚然曰是崛強兒不肖受一簞

者耳即先布檄身單騎馳而往衆大驚俱匐伏請命  
公唯治首亂者數人餘盡釋之復條為食飢法上臺  
使者時帝已念齊魯災許發帑賑未至公曰若必待  
此民十死八矣虛上恩益吏罪請貸所在應內輸錢  
急散之民藉以蘇歷遷江西布政使有中使以權至  
先檄藩臬諸長吏俱迎勅公揚言曰是勅中使非勅  
所守土者也例不得迎中使為氣沮其所移公書自  
稱予公叱其使曰若中貴人何敢自稱予往高皇帝

起吳時常稱予若欲何為耶中使聞之大懼立造謝  
死罪又一日移書稱詔視藩藏公第以籍視之終不  
為屈以入覲得寒疾卒年六十有八公居官所歷好  
視其形勢考其沿革每有所諮詢爛若披掌性樂易  
于功名之際更為澹然自其族父嘉則先生以布衣  
起東海高論文章一時諸從如肩吾大若門風甚盛  
然公尤自許朗鑒每見人持行卷謁肩吾輒笑曰家  
弟豈知文奚不就我嘉則先生初以豐對樓詩屬余

君房論定君房報書曰吾于詩雖得窺其藩未入其室此事終當屬君家箕仲公竟為嘉則刪敘其集其為一時推重若此所著曲轍居集行世

善哉行

今日樂胥來日可虞天迴地游人莫之知

一解

彼絃我歌會少離多明星可掇蕭駕經過

二解

三十六輻輪輪相復但惜馬蹄不惜車軸

三解

西門行

出西門望金天東方欲出日方今入虞淵纍纍誰家墳  
松柏始齊肩昨日車馬咽道路行人逼側不敢干一解  
盍有儲酒囊有儲錢適來故所歡何不酣歌明燭前醉  
時不見嗔醒後還相憐二解

哀哉灌仲子杯酒生戈鋌豈不勞斟酌作色矜一言  
今日樂相樂毋為鬱抑坐相煎三解

贈程公

結髮營世業落落青雲姿十上不見收掉臂辭當時冥

觀但一壑中有千年期丹溜一斟酌出入乘青霓期榮  
無晦朔決起日東西安知特達士綿邈心所晞白髮垂  
垂生不受清霜欺袖中有黄石偏令孺子知

嘯臺

歷亂登崇岡荒臺闌虛壑纏懷嘉遯士冥栖欣所托長  
流挂葱蒨羣峯縕叢薄初期已邈然是否失今昨不識  
行者勞安知彼所度牽率非吾真迤邐乖誠諾龍章既  
摧殘鳳響亦淪沒陶然命杯筭箕踞憑寥廓

宿蘇門懷四十二從父

伊昔稱尚事適來果心賞喬木  
翳坡陀清湍激下上道在迹不陳知  
希物彌獎言願滌邪飾還因跂末響幽躋  
竟誰諧蕭條賴吾黨吾黨洵特達  
叔氏驅前往柄遲眷中林鳳鸞亦朗朗

寄壽四十二從父

文章叔氏登壇早雄心未銷雙鬢老  
日月長懸短布寒山川自向衡門老  
衡門何處中散林芙蓉江邊綠雨深

青棠孤館纔十尺高臺面面羅雲岑兒昔與父同出處  
骨肉相師亦相許大人落落營千秋小兒卑卑干一舉  
不然提攜起末行豈令當世徒張皇我思弘正之間迄  
今日紛紛諸子誰升堂祗笑前人忘已拙作色相矜開  
別轍可憐風雅直至今父起布衣光烈烈懷中挾得三  
千首都門賢達爭馳驟未許名山副本藏相如寧困臨  
邛否

賦得大江送周使君

大江茫茫割吳楚九派千山恣吞吐英雄力盡波上銷  
老蛟不怒真龍怒真龍一起江水清東南靈氣開帝京  
六朝霸業何瑣瑣生死自保江頭城雄圖不但天所授  
氣壓萬古驅羣英至今精爽駐城闕夜夜照見江波明  
崔嵬闔闔天邊啟中使宣傳拜天子不見天衣宮裏來  
徒聞仙仗雲中起使君行矣隨鵠鸞聖人經營特可觀  
兩都並設存舊貫拖朱曳紫皆王官我將江水送君去  
白鷺之洲落何處夜半月出江風生一片相思綠楊樹

送王懋欽守開封

王郎落落風塵裏青天無雲孤鶴起文章能事口不言  
經綸老手心自喜偃蹇西曹閱歲時沈吟此身論進取  
一朝被命守汴都五馬驅人渡漳水今日中原正腰腹  
古來大梁說朝市晨起判事腕欲脫日暮千人膝生胝  
當路與君號知已何乃勞人太無禮知君才大心中閒  
臥而治之有餘理東門古道秋草黃脩竹遺墟暮烟紫  
雪花片片到寒帷嶽色橫天決雙臂

蚤涉揚子

緒風江水惡凍日海門生人馬慘行色山川奪故形  
纊焉懷遠道老矣愧微名何處無波浪誰言不可行

送四十二從叔之海上收朱邦憲遺草

歎息論交日重悲過友生黃壚知朽骨白日挂空名後  
死身能報遺文手自評千秋良有待莫道世人驚

錢唐道中

西發錢唐路錢家舊路多氣暄依密樹村盡見平波石

骨潮能食山腰浪始過秦王看汝泣東度復如何

雨中東吳山人汝震時寄居鐵柱觀

倚柱看黃鳥窺檐拂翠條吾衰春亦去汝病興還饒山色樓中雨江聲郭下潮何如平楚外烟柳赤欄橋

初至茂嶼呈張大司馬

清溪窈窕覓仙踪臨水看雲面面重山過雨聲侵薜荔風吹秋色滿芙蓉湖天浩渺懸孤嶼海日東南引萬峰豈是桃源無路到扁舟今日使人逢

贈吳元美七十

百年居第共烟村生長相看世道存父老每同春賽社  
人家多自水臨門但愁狂態尊前減已判浮名物外論  
最喜西來千丈鏡不慙華髮照乾坤

發松林

懷仙尋紫柏問道出青松鳥喚風前韻山開雨後容

王郎灘

東家黃犢健西家驛角彎兩兒賽歌曲但向王郎灘

探丸

早時走馬夜探丸  
新血模糊著錦鞍  
背地殺人酬郭解  
當場說劍笑燕丹

采蓮曲

千媚郎君百媚娘  
大堤相望水中央  
盈盈度槳難傷藕  
細細尋絲易斷腸

布政使沈公一中

字長孺號大若少與從兄一貫族兄九疇同研席知

名人方之三謝初中進士值江陵當軸其二子亦以  
是科第上等使交同榜名士公所最注目者然公澹  
然弗顧也授都水主事議罷神嶺山采石民得不擾  
稍遷儀制郎中多與藩邸閱時瀋藩負大力有所干  
請俞旨每從中出公爭甚強事得寢出以按察副使  
備兵上荆荆多庶宗貧無賴不受有司約公為曲貸  
其困已稍整齊之遂循循奉法擢山東參政以病致  
仕起補福建參政稅璫高宗與紅毛番通許其貢市

為疏請而番舶已泊漳門公亢言疆臣無延寇入門  
理宜以死守下令集舟師逼使去瑞無以奪其疏入  
亦遂不行進按察使遷河南布政使徙貴州其地無  
成賦一切車輅之備仰給隣壤適徵發巨材人多受  
值而遁隣值因不至公下令先輸木者受鋸立得材  
三千金筑安撫其民頗馴數苦豪右侵公具請使內  
比為州拓地千里遂力請骸骨歸里逾年卒方公初  
釋褐從兄文恭公已在史館及文恭枋國深以家門

貴盛為嫌不宵引兄弟使同列公亦遠自引避每與  
客語終日未嘗一及相君人或徵起居唯唯而已嘗  
言吾輩堅立脚根庶晚節不至秋蓬轉雖有智巧豈  
能益吾命所無其自守若此所著有書禮二經補註

梅園集

雜興

選木積幽翠田田被清池柯間邁扶疎日月潛投輝遊  
鱗競滙濶浮藻何紛離散步樾下陰兀坐池上磯日暮

霞彩發水際雲光披熠熠林間螢綴目如珠璣朝夕饒  
應接俯仰無危機對客烹蓴羹呼童理藥畦茲境洵可  
懷容與無窮期

明月篇

空庭流素影忽見秋滿地舉頭羞明月低頭暗流淚仕  
宦牽微祿行商徇高貲不商又不仕長日留天涯天涯  
在何方水上到維揚維揚客幾許七日到錢唐長日不  
宜閒清宵且勿眠眠時離夢到閒處別愁牽

再登天門洞不果

昨日黑探天門洞兩人緩步三人扶石龕半嵌春屋古  
青壁倒浸江天孤焚香趺坐一僧瞑引路出沒雙童呼  
三年不見徒縹渺獨望頗欲吞江湖歸夢乍醒輒欲往  
兩脚已倦氣力無嗚呼上山已歎氣力無何以躍馬遊

京都

春分日

日展春寒薄風恬霽景流四陽初大壯百刻正鴻溝食

案前雛鵠漁磯下野鷗讀書有餘暇時對撒秧舟

邊城

麗譙初報夜刀斗正鳴秋徙節陰風急開弓凍月愁鞶  
來青海角馬飲黑山頭劍尾流光動妖星焰戍樓

梅湖山房夜宿

霜露驚時變庭除隱月光茫茫烟樹闊靄靄岫雲涼虎  
嘯山疑裂雞鳴夜轉長有懷愁不寐明發舉秋嘗

旅館

旅館江湖晚孤臣疾病真洩雲霑夕幔歸夢壓重茵不  
寐懷千載無端滯一身淚流占髀肉吾愧據鞍人

泛舟芙蓉苑

桃李三春夜芙蓉百尺臺青山載酒去明月刺船回細  
荇魚羣入青叢鹿自來舊時題石處餘興尚悠哉

送別

酒逢春暮別驅馬不勝情喙自長三尺須今白幾莖青  
山猶故色江燕已新聲豫恐悲殊調終當見獨行

馬當

蚤發鱣魚觜西風過馬當日連波皛皛天入樹荒荒遠  
岫能相遲歸鴻不記行禹功疏淪苦今古戒垂堂

高唐城外

徑小添沙面渠奔踞石梁好山青不盡疎柳綠無行鳥  
過春聲換村留雨氣涼兒童炊旅飯城郭認高堂

同謝丈夜尋天門洞

三載曾游洞孤筇此共尋哀湍猶谷口新月況波心犬

吠疑深寺人扶見遠岑維舟不自意草草得登臨  
渺渺迴林壑迢迢上石梯屢逢春樹歇漸與暮天齊雲  
護松杉古烟沈虎豹迷中峯結茅屋記得有人栖

尊湖

烟水最幽絕遙空晚氣涼潛虬弄波澗去鳥曳雲長艇  
進參差浦花生遠近香蕭疎丘壑意獨立萬山蒼

三月三日滁州

古堂七日容高臥上已春陰眼乍開納納乾坤誰主客

冥冥風雨自樓臺  
颺牆銀杏可三丈  
關戶黃鸝能百迴  
韋闢歐亭俱不惡  
登臨空羨掌中杯

滁州道中雨

滁州城郭接天還  
高下肩輿春雨間  
古坂長橋泥滑滑  
蒼林幽谷水潺潺  
溪要半渡遲回馬  
樹頂時摩出沒山  
行路苦難真自哂  
題詩聊復破愁顏

晴

舟中時雨復時晴  
雲豁江空事事清  
晃日山川多氣色

入春天地得開明輝輝吐蕊花相學冉冉摩霄鷹不驚  
南馬北驅知漸得一尊聊與客同傾

秋宮怨

桂殿重重鎖碧雲離宮歌鼓夜深聞久拚衰鬢從秋草  
只夢家山不夢君



甬上耆舊詩卷十七